

मार्निंग डोगरी न्यूज़ बुलेटिन, समें. 09.20 Hrs

<><><><><><>

## Headlines

- प्रधानमंत्री नरेंद्र मोदी होर कल 21 फरवरी गी दिल्ली दे भारत मंडपम च SOUL लीडरशिप कॉन्क्लेव दा उद्घाटन करडन।
- मुख्मंत्री उमर अब्दुल्ला होरें सैलानिएं गी आखेआ ऐ जे ओहू जम्मू-कश्मीर औन, कीजे हून इत्थूं दा माहौल हर किस्मै दे सैलसफा लेई भलेआं साजगार ऐ।
- सरस आजीविका मेला अज्जै थमां जम्मू दे कला केंद्र च शुरू होआ करदा ऐ।
- मौसम विभाग नै औंदे 24एं घंटे दौरान जम्मू-कश्मीर दे बकख-बकख इलाकें च हल्के कोला दरम्याने दर्जे दी बरखा ते बर्फबारी दी पेशगोई कीती ऐ।
- आई.सी.सी चैंपियन्स ट्रॉफी 2025 च भारत दा पैहला-पैहला मैच अज्ज दुबई च बांग्लादेश कन्नै होग।

<><><><><><>

## PM-Soul

प्रधानमंत्री नरेंद्र मोदी 21 फरवरी गी नमी दिल्ली दे भारत मंडपम च SOUL लीडरशिप कॉन्क्लेव दे पैहले संस्करण दा उद्घाटन करडन। भूटान दे प्रधानमंत्री दाशो शेरींग तोबगे मुख् अतिथि दे तौर पर मुख् भाषण देडन।

दो दिन दा SOUL लीडरशिप कॉन्क्लेव इक प्रमुख मंच दे तौर पर कम्म करौग, जित्थे राजनीति, खेड, कला ते मीडिया, आध्यात्मिक दुनिया, सार्वजनिक नीति, व्यवसाय ते सामाजिक क्षेत्र जनेह विविध क्षेत्रें दे नेता अपनी प्रेरक जीवन यात्राएं दे तजुबे सांझे करडन। एहदे नै उंदिएं कामयाबिं, उपलब्धिं, नाकामिं-गलतिं सोयां सिक्खने दा मौका थ्होग ते कन्नै युवा दर्शकें गी प्रेरणा मिलौग।

<><><><><><>

## CM-Tourism

मुख्यमंत्री उमर अब्दुल्ला होरें एह आखदे होई कि जम्मू-कश्मीर च हर इक सैलानी दी पसिंद दा साल भर किश ना किश जरूर रौहंदा ऐ, लोकें अगो अपील कीती ऐ जे ओह जम्मू-कश्मीर जरूर औन। नमीं दिल्ली दे यशोभूमि च आयोजित दक्खन एशिया दे यात्रा ते सैलसफा सरबंधी SATTE प्रदर्शनी दे उद्घाटन मौके बोलदे होई मुख्यमंत्री जेडे उत्थे मानजोग परौहने दे रूपै च मजूद हे, होरें आखेआ कि भाएं कोई धार्मिक यात्रा करना चाहंदा ऐ जां फही कुदरती नजारें दा नंद ठोआना चाहंदा ऐ, कोई साहसिक सैलसफा च दिलचस्पी रखदा ऐ जां कोई ब्याह कार्ज करना चाहंदा ऐ, जम्मू-कश्मीर च हर कुसै लेई औहदे मन माफक थाहरां मजूद ना। उनें इस मौके अमीर खुश्रो दा कश्मीर बारै फारसी च खोआन बी पढेया जेडा आखदा ऐ कि धरती पर जेकर कुदरै सुर्ग ऐ ते ओह इत्थे गै ऐ। उनें आखेआ जे एल्लै कश्मीर दा माहौल पूरी चाल्ली रमानदारी आहला ऐ, अज्ज सैलसफा ते रास पूंजी लाने दे लिहाज कन्नै, जम्मू-कश्मीर हर कुसै दी पैहली पसिंद बनी चुके दा ऐं पिछले 3 दहाकें दौरान दरपेश चुनौतिं कोला जम्मू-कश्मीर बाहर आई चुके दा ऐ ते एहदे च कोई शक नेई जे सैलानिं, फिल्म निर्मातां, खडारिं, विद्वानें, सैर-सपाटे दे शौकीनं ते प्रकृति दे प्रेमिं लेई बी एह पैहली पसिंद बनी गेदा ऐ।

<><><><><><>

## CS-TDAS

मुख्य सचिव अटल डुल्लू होंरें जम्मू-कश्मीर दे बक्ख-बक्ख सैलसफा विकास प्राधिकरणें दी कारकरदगी दा जायजा लैने लेई इक बैठक सद्दी ते जोर देइयै आखेआ जे इनेंगी मता असरदार बनने लेई अपनी कार्जकुशलता ते अपने संसाधनें वसीलें दी आधार गी होर निगगर बनाना होग। मुख्य सचिव होंरें खजाना ते सैलसफा मैहकमे गी आखेआ जे अपनिएं संपत्तिएं सवां औंदन राजस्व हासल करने लेई कम्म करना। उनें सैलसफा विकास प्राधिकरणें दिएं जिमिएं दी निशानदेई करने ते उंदे बेहतर प्रबंधन ते इस्तेमाल दा बी निर्देश दित्ता तां जे इंदी औंदन च बाद्दा होई सकै।

<><><><><><>

## Amarnath-Yatra 2025

रामबन दे जिला विकास कमिशनर बसीर उल हक चौधरी होंरें कल इक मीटिंग दी अध्यक्षता करदे होई 2025 बरे दी श्री अमरनाथ जी दी जात्तरा गितै कार्य योजना दा व्यापक जायजा लैता। उनें सरबंधित सब्भनें मैहकमे गी निर्देश दित्ता जे ओह जिलल च यात्रिएं दे ठैहरने, लंगर, साफ-सफाई, पानी, बिजली दी सप्लाई, सेहता सुविधाएं ते सुरक्षा समेत लोडचदे सारे बंदोबस्त यकीनी बनाने लेई आपूं च नेडमां तालमेल बनाइयै कम्म करने लेई आखेआ तां जे यात्रा गी पूरी चाल्ली रमानदारी ते बवस्था आहले ढंगै सिर तोड चढना यकीनी बनाया जाई सकै।

<><><><><><>

## Delhi CM

श्रीमती रेखा गुप्ता होर अज्ज दिल्ली दी नमी मुख्यमंत्री दे तौर पर सगंध लैडन। कल नमी दिल्ली च दिल्ली भाजपा विधायक दल दी बैठक मगरा नमें मुख्यमंत्री दे तौर पर उन्दे नां दी घोषणा कीती गेई। रेखा गुप्ता होंरें उपराज्यपाल विनय कुमार सक्सेना हुन्दे कन्ने मलाटी कीती ते नमी सरकार बनाने दा दावा पेश कीता। सक्सेना होंरें दावा स्वीकार करदे होई उनें गी नमी सरकार बनाने आस्तै साद्दा दित्ता।

उपराज्यपाल होर अज्ज दपैहरी 12 बजिऐ 35 मिनट पर उनेंगी औहदे ते राजदारी दी सगंध दौआडना। प्रधानमंत्री नरेंद्र मोदी, गृह मंत्री अमित शाह ते रक्षा मंत्री राजनाथ सिंह हुंदे बी इस समारोह च शामिल होने दी मेद ऐ। इस कार्यक्रम लेई कोई करीब 20 राज्यें दे मुखमंत्रियें ते उपमुखमंत्रियें गी बी साददा दिता गेदा ऐ।

<><><><><><>

## SARAS-Aajeevika Mela

जम्मू-कश्मीर ग्रामीण आजीविका मिशन आसेआ आयोजित सरस आजीविका मेला अज्जै थमां जम्मू दे कला केंद्र च शुरू होआ करदा ऐ। ग्रामीण विकास ते पंचैती राज मैहकमे आसेआ आयोजित 10एं दिनें दा एहू मेला पैहली मार्च तोड़ी चलोग जित्ि भारत दी कला संस्कृति ते रिवायतें दा बन-सबन्ना संगम दिक्खने गी लब्बोग। इस बारै होर मती जानकारी देआ करदे न आकाशवाणी दे जम्मू संवाददाता।

<><><><><><>

## IMD

मौसम विभाग नै पच्छमी हिमालय खेत्तर च 48 घंटें च टामीं-टामीं कोला बड़ी मती बरखा ते बर्फबारी होने दी पेशगोई कीती ऐ। विभाग नै आखेआ ऐ जे उत्तर पच्छिम भारत दे मैदानी इलाकें च बी टामीं-आमीं बरखा होई सकदी ऐ। विभाग नै एहू बी पेशगोई कीती ऐ जे जम्म-कश्मीर, लद्दाख, गिलगित, बाल्तीस्तान, मुजफ्फराबाद ते हिमाचल प्रदेश च अज्ज हल्के कोला दरम्याने दर्जे दी बरखा ते बर्फबारी होई सकदी ऐ ते कल शा लेइयै 23 फरवरी तगर हल्की बरखा ते बर्फबारी होने दी मेद ऐ।

<><><><><><>

## SIT-Kathua

कठुआ जिले दे दूर-दरेडे ग्रां च 2 जनें दी हत्या आहले मामले दी जांच लेई पुलस दे इक एस.पी दी अगुवाई 6 मिम्बरी विशेष जांच टीम बनाई गई ऐ। आकाशवाणी दे जम्मू संवाददाता नै जानकारी दिती ऐ जे 16 फरवरी गी जिले दे बिलावर इलाके दे ग्रां बठेरी च इक नाले दे कंडे 45एं बरे दे रौशन लाल ते 37एं बरें दे शमशेर दियां लोथां बरामद कीतियां गेइयां हियां जिंदी पोस्ट मार्टम रिपोर्ट च एहू गल्ल सामने आई ही जे दौनें गी गल घोटिए मारेआ गेदा ऐ। पुलस फौज दे नीम फौजी बलें दी इक सांझी टीम इलाके दे जांगली इलाके च बी खोजबीन करै करदी ऐ पर अजे तोड़ी कोई सूह जां सराग हत्थ नेई लग्गा ऐ। ध्यानजोग ऐ जे पिछले किश समें दौरान बलावर च आतंकवाद सरबंधी घटनां बी पेश आइयां ना। पिछले बरे सेना दी इक गश्ती टीम पर हमले च 5 सैनिक शहीद होई गे हे।

<><><><><><>

## Rana-FPZ

जलशक्ति मंत्री जावेद राणा होरें कल राजस्थान दे उदयपुर च आयोजित दुई कुल भारत राज्य मंत्रिणं दे सम्मेलन च “flood plain zoning” विषय पर आयोजित सत्र दी सांझे तौरा पर अध्यक्षता करदे मौके आखेआ जे इस रौं गी अपनाने दी बड़ी मती लोड ऐ तां जे हाडत्रें दा व्यापक प्रबंधन करियै इंदे शा होने आहले नुकसान कोला बचेआ जाई सकै। इस सम्मेलन दा आयोजन जल शक्ति मंत्रालय दे राष्ट्रीय जल मिशन आसेआ कीता गेदा हा जेदा विषयसार हा “water vision@2047” जेदा मकसद 2047 तगर भारत गी पानी दे लिहाज कन्नै इक सम्पन्न ते सुरक्षित मुल्ख बनाना ऐ।

<><><><><><>

## ICC

आईसीसी चैंपियंस ट्रॉफी दे 9में संस्करण दी शुरुआत च गै न्यूजीलैंड नै कल राती कराची च खेडे गेदे मैच च पाकिस्तान 60 रन कन्नै हराई दिता ऐ।

टॉस जीतिऐ पैहले गेंदबाजी करदे होई पाकिस्तान गी न्यूजीलैंड दी टीम गी रोकने आस्तै संघर्ष करना पेआ, जिने 50 ओवरें च 5 विकेट पर 320 रन बनाए। जवाब च पाकिस्तान दी टीम 47 ओवर 2 गेंद च 260 रन पर गै सिमटी गेई। रोहित शर्मा दी अगुवाई च भारतीय टीम दा मुकाबला अज्ज दोपहरी दुबई इंटरनेशनल स्टेडियम च बांग्लादेश कन्नै होग। मैच भारतीय समें मूजब दपैहरी ढाई बजे शुरू होग।

<><><><><><>